



Република Сербия  
**МИНИСТЕРСТВО ПРОСВИТИ,  
НАУКИ И ТЕХНОЛОГИЙНОГО РОЗВОЮ  
КАБИНЕТ МИНИСТРА**

Число: 601-00-9/1/2020-01

Датум: 16.3.2020. року

Београд

Неманьова 22–26

**РОДИЧОМ/ЗАКОНСКИМ ЗАСТУПНИКОМ ШКОЛЯРОХ  
ОСНОВНИХ И ШТРЕДНІХ ШКОЛОХ**

Почитовани,

Обвисцуеме вас же Влада Републики Сербії одлучела же би ше, пре хвилькову епидемиологийну ситуацию у жеми, дочасово застановело непоштредну образовно-воспитну роботу у основних и штредніх школах на території Републики Сербії. Пре витворйоване правох школярох на образованє, Министерство просвити, науки и технологийного розвою пририхтало оперативни план за предлужене роботи школах у очежаних условийох, преїг витворйованя образовно-воспитней роботи зоз ученьом на далекосц, з оглядом на тото же дочасово застановйоване непоштредней настави у школах не значи и застановйоване образовно-воспитней роботи зоз школярами.

**Початок реализациї образовно-воспитней роботи зоз ученьом на далекосц то 17. марец 2020. року.**

Витворйоване образовно-воспитней роботи предвидзене преїг розличних способох и приступох у витворйованю комуникації зоз школярами и родичами/законским заступніками (у дальшим тексту: родичи), при чим ше будзе водзиц рахунку о вкупних людских и технічних ресурсох школах, як и технічних капацитетох фамилийох школярох.

У організованим ученю на далекосц хторе обезпечує Министерство, фокус на програмних змистох общеобразовних и фахових предметох з найвекшим фондом годзинох. Окрем того, школи маю обовязку, у складзе зоз власнима ресурсами за потримовку у ученю на далекосц и з хаснованьом доступних платформох за учене, обдумац способи за витворйоване змистох и за шицки други предмети и програми, на основи предписаного плану и програми настави и ученя.

Пре витворйоване єднаких правох на образованє шицких дзецох, школи маю обовязку, кед не иснує можлівосц запровадзованя комуникації зоз школярами зоз хаснованьом інформаційно-комуникаційних технологийох, винайсц алтернативни способи у

даваню потримовки у ученю, водзаци рахунку о шицких препоруках за превенцию ширеня вируса COVID-19, маюци у оглядзе, насампредз, школярох хтори приходза зоз фамелийох нїзкого социялно-економского статусу, як и шицких школярох хторим не на розполаганю електронски способи комуникації и инши сучасни комуникаційни ресурси (напр. з обезпечованьом друкованого материялу за роботу або упутствох за учене хтори класни старешнове доручую родичом).

За **школярох основней школи** Министерство просвити, науки и технологийного розвою пририхтало едукативни змисти за учене на далекосц, хтори буду емитовани на Радио телевизії Сербії, Канал 3.

Шейсц дні у тижню, починаючи од вовторку 17. марца 2020. року, од 8.00 годзин буду емитовани наставни єдинки общеобразовних предметох, по розпорядку хтори будзе доступни преїг сайту школи, сайту министерства, як и на [www.rasporednastave.gov.rs](http://www.rasporednastave.gov.rs). Тиж, розпорядок емитованя будзе визначени и на местох за оглашоване у самей школи (уход школи, вонкашня огласна табла).

За шицких школярох од 1. по 7. класу ше будзе емитовац образовни змисти у блоках од по два годзини дньово. За школярох 8. класи ше будзе емитовац едукативни змисти у блоках од по три годзини дньово, з хторих два вше буду сербски язык и математика, а треца годзина єден з предметох хтори ше поклада на закончуючим испиту. Шицки емитовани змисти од наступного дня буду доступни за неогранічене число препатранку на платформи РТС Планета. Оператере не буду наплацовац прецек и преношене податкох за наведзени едукативни змисти (безплатни интернет минути).

Инши едукативни змисти за учене и упутства за роботу за емитовани годзини, як и за предмети хтори не облапени зоз ТВ емитованьом, одзеленски старшинове або предметни наставніки прешлїдза школяром або родичом школярох преїг Viber групох або по електронскей пошти (напр. препорука текстох у учебнікох хтори треба пречитац, линкох на хторих ше находза презентації и филми, препорука задаткох за вежбане, упутства за виробок домашнього задатку и подобне).

У пририхтованю и годзини на языкох националних меншинох (предмет – мацерински язык од 1. по 4. класу основней школи) хтори будзе емитовани на РТВ 2, але и на даєдних локалних и приватних телевизийох. Тиж, на платформи РТС Планета за школярох припаднікох националних меншинох хтори у цалосци нащивюю наставу на мацеринским языку, буду доступни и други дигитални змисти, як и знімки годзинох. Змисти хтори хибя на мацеринским языку, школяре могу провадзиц на сербским языку преїг каналох РТС 3 и РТС Планети. О початку емитованя и поставяня змистох, школи а на тот способ и родичи, буду информовани преїг сайту Министерства и сайтох националних совитох националних меншинох. Наставніки хтори витворюю наставу на языку националней меншини тиж маю обовязку дац додатну потримовку у ученю, преїг шицких розполагаюцих формох комуникації.

За **школярох штредніх школах** преподаваня зоз общеобразовних предметох и дзепоедних фахових предметох буду доступни преїг платформи РТС Планета. Обовязка штредней школи же би на своїм сайту поставела банер зоз шицкими линками на хторих мож приступиц гу лекциейом и платформом за учене.

За школярох хторим потребни структуровани индивидуализовани приступ у работи, односно прилагодзоване у рамикох индивидуального образовного плану (ИОП), ИОП-1, ИОП-2 и ИОП-3, наставніки пририхтаю окреми материяли за учене и оможлівя їх доступносц школяром на способ на яки ше догваря з їх родичами.

Наставніком и школяром основней и штредней школи на розполаганю вельке число онлайн платформох (Viber, Zoom, Microsoft Teams), як и национална платформа за онлайн учене *Моя школа*. Зоз їх хаснованьом, наставніки и школяре буду у ситуациі витвориц интеракцию и черанку материялох у функції звладованя програмних змистох. Упутства и педагогийни препоруки за хасноване тих платформох ше находза на интернет-боку [www.rasporednastave.gov.rs](http://www.rasporednastave.gov.rs) и їх хасноване бесплатне. На урядовим интернет-боку Министерства буду поставени одвитуюци упутства, як и обвисценя о датумох у вязи зоз початком їх функционованя.

У найлєпшим интересу школярох, їх розвою и образования, а пре успишне закончене чечуцого школского року, модлі ше родичох же би одвичательно и у складзе зоз своїма можлівосцями контроловали процес ученя од дому и стимуловали школярох на порядносц у работи. Циль доступносци змистох за учене то витворйоване самого процесу ученя, хторе ше пре позарядово обставини предлужи дома, з потримовку наставнікох, але и самих родичох. Школяре буду доставац упутства за вежбане, виробок домашніх задаткох, писане есейох, виробок презентацийох и других продуктох хтори сами або з помоцу родичох, зависно од возросту и дигиталних компетенцийох, буду доручовац наставніком преїг e-mail або другей образовней платформи и то за шицки предмети, зоз чим ше обезпечи континуитет у ученю, проваджене напредованя и можлівосц оценьованя. Тото потвердзує и обовязка наставнікох же би шицки реализовани наставни єдинки евидентовали до електронского дньовніка и/або до других формох педагогийней документациі. По нормализованю условийох и по врацаню до учальных шицки квалитетни формативни оцни и увиди наставнікох можу буц значно вихасновани за сумироване оценьоване на концу наставного року.

Шицко тото предусловия за сигурне закончене школского року и предлужене школованя. Лем зоз порозуменьом интересох школярох и потримовку родичох тоту обовязку можеме ведно успишно реализовац.

З поштредованьом школах родичи буду доставац и други упутства од компетентних органох вязани за епидемиологийну ситуацию, але и хасновити совити як форму психо-социальной помоци у позарядових обставинох.

Додатни информациі у вязи зоз ученьом на далекосц, як файту потримовки настави, родичи можу достац з поволанку на число телефона: 011/735 05 57.

Дзекуєме на порозуменю и сотрудніцтве,